

ALAHADY FAHA 26 MANDAVANTAONA - B



“ Fa izay tsy manohitra antsika dia momba antsika » (Mk. 9: 39)“

Ry Kristianina havana, tamin’ny Alahady lasa teo isika nanantitrantitra ireo toetra fototra lehibe nahatonga an’i Jesoa nanambara fa tsy maintsy manana ny toetran’ny zazakely isika eo amin’ny fifandraisantsika andavanandro sy nilazany koa fa izay te ho lehibe aminareo aoka izy ho tahaka ny zazakely ary ho vonona hanompo satria izany no làlana hahafahana miroso lalindalina kokoa amin’izay fiainana sy fiombonana amin’Andriamanitra. Averintsika vetivety ireo toetry ny zazakely tsara anana : fitokosina an’Andriamanitra, fahatsorana mitondra amin’ny marina mandrakariva,

fahadiovampo. Amin’izao Alahady faha 26 mandavantaona izao rehefa mijery ny zava-misy isika dia mety milaza hoe ahoana àry hanatanterahana an’izany fiovana ho toy ny zazakely izany ?

Fantaro fa miasa ny Fanahin’Andriamanitra, izy no manova ny fo amam-panahintsika ka hnampy antsika hanana ny

toetry ny zazakely eo amin’ny fiainantsika andavanandro, hahatoky an’Andriamanitra tanteraka, hanana ny fahatsoram-po sy hivelona ny fahamarinana eo amin’ny fiainantsika, hanana ny fahadiovam-po hahita ny sitrak’Andriamanitra. Izay madio fo no mahita an’Andriamanitra izany hoe manatanteraka ny sitrak’Andriamanitra raha mandray ny tenin’Andriamanitra sy ny tenan’Andriamanitra amin’ny alalan’ny Eokaristia izay ataontsika isaky ny Alahady ka mahatonga

Vakiteny I : Fanis. 11, 25-29

Tononkira : Salamo 18

Vakiteny II : Jak. 5, 1-6

Evanjely : Mk. 9, 37-42. 44. 46-47

antsika ho mpanorina, sy ho fianakaviana iray ao amin'Andriamanitra. Hahatonga antsika ho Eglizy Olona Velona fahazavana sy fanasina eo amin'ny manodidina antsika hanehoantsika fa isika izao no Kristy mpiara-belona amin'olona.

Rehefa entanin'izany Fanahy masina izany isika dia izy no mahatonga antsika tsy hoe hitsara fa hanatsara ireo mifandray amintsika. Ny sasany manko noho ny toetra feno fihatsarambelatsihy dia matetika mitsara, mifosa ka mahatonga ny korontana eo amin'ny fiaraha-monina. Izany indrindra no niseho tamin'ireo vahoakan'Andriamanitra tany an'efitra ka ambaran'ny vakiteny voalohany ao amin'ny bokin'ny Fanisana. Io korontana io no nahatonga ny olona sasany nanatona an'i Moizy ka nanambarany fa ireo 70 lahy voafidy hiara-miasa akaiky aminy dia nandrotsahin'ny Tompo ny fanahiny koa ka afaka mitarika ny vahoaka.

Amin'izao ankatoky ny fifidianana izao maresaka be ny propagandy, aoka isika hiaraka hivavaka mba ho feno ny Fanahy masina tokoa ireo izay nirotsaka ho fidina ka hikarakara ny vahoaka araka ny voalazantsika teo : hanatsara fa tsy hitsara ny hafa hitsikera, hikatsaka ny soa iombonana, hanao izay hampandroso ny firenena ary ho mpaninany. Ny mpaminany tsy hoe mahafantatra ny hoavy fa hametraka ny fahasoavana ny hoavy araka ny sitrak'Andriamanitra satria ny sitrany dia hahatonga ny maha olona antsika ho feno sy ho feno fivelarana ny maha-olona manontolo. Izany no nahatonga an'i Jesoa ao amin'ny Evanjely raha nisy ireo nanatona azy ka nilaza hoe : “ireto dia tsy miaraka amintsika”. Aza raranareo hoy i Jesoa fa tsy misy olona hanao famantarana amin'ny anarako ka hanaratsy ahy vetivety foana fa izay tsy manohitra antsika dia momba antsika. Ny tian'i Jesoa ambara dia tsotra, aoka izay hanambara an'i Jesoa dia hanambara ny hafatr'i Jesoa manontolo fa tsy hamboaboatra azy araka izay saim-pantany, raha manambara ny hafany manontolo izy na dia mbola tsy mahafantatra an'i Jesoa aza dia afaka miara-miasa amin'ireo izay miombona amin'i Jesoa.

Tsy fanilikilihina no ambaran'i Jesoa fa isika Kristianina dia miombona amin'ny olona rehetra manaja ny aina sy manaja ny fiombonana ary ny maha olona manontolo, tsy afaka hiaraka amintsika kosa izay rehetra tsy manaja ny aina, tsy manao ny marina, tsy manaja ny maha olona manontolo. Fantantsika araky ny voalazan'i Jesoa fa asan'ny Fanahy masina ny fiombonana aminy.

Aoka tsy ho hisy ny fanafintohinana hoy i Jesoa, izay ny tena loza, “ *Ary na iza na iza hanafintohina ny anankiray amin'ireny madinika mino Ahy ireny, dia tsaratsara kokoa ho azy ny hanantonana vato fikosohan-dafarîna amin'ny vozony, ka havarina any anaty ranomasina izy*”.

Ny fanafintohinana no manimba ny fiombonana sy ny fikatsahana ny soa iombonana. izany indrindra no manapotika ny tontolo telo izay lazaintsika matetika ka aoka àry ho halavirintsika ny fanafintohinana na ao anatintsika izany na ety ivelany. Izany no mahatonga an'i Jesoa milaza, raha ny tananao, ny tongotrao, ny masonao no manafintohina anao dia tapaho fa aleo kilemaina miditra amin'ny fanjakan'ny lanitra. Matetika dia avy ao anatintsika ao no mahatonga ireny fanafintohinana ireny. Raha tiantsika ny ho taranaka mpanorina dia aoka isika hiaiky ny fahalemena ao amintsika ka miova mba tsy hanafintohina ny hafa.

Ambaran'i Md Jakoba fa ny fototry ny fahalemena dia ny harena. Tsy ratsy ny harena fa raha izy no tompoina ka omena toerana kokoa mihoatra ny fifandraisana amin'Andriamanitra dia zary fahalemena. Ny toetrantsika io dia harena raha atao hanapotehana ny hafa anefa, hanapotehana ny

tontolom-piainana sy ny tontolom-pinoana, hitantsika ny vokany eo amin'ny fiainantsika dia tsy inona fa ireny herisetra, ireny famonoana, ireny fandatsahan-drà etsy sy eroa ireny ka mahatonga ny tsy filaminana intsony eto amintsika. Ny harena no mitarika ny fahalovana rehetra eo amin'ny fiainantsika ka aoka hiala amin'izany harena diso izany isika. Tsy ny harena no ratsy fa misy ny harena mitarika amin'ny fahalovana rehefa izy no tompoina sy atao Andriamanitra ka manapotika ny fifandraiantsika satria takotry ny harena ratsy ny bitsiky ny Fanahy masina izay manatsara mandrakariva fa tsy mitsara, mitady ny soa iombonana sy ny fiombonana ary ny fiadanana. Fa ny harena mitarika amin'ny fahalovana dia ny fialonana mitondra amin'ny herisetra. Aoka isika hiombona bebe kokoa hatrany amin'i Kristy satria Izy no làlana sy fahamarinana ary fiainana, raha miaraka Aminy isika dia ho afaka hanorina ny Eglizy Tranon'Andriamanitra izany, sy hanatsara ary hikorokoro ny tranobe iombonantsika ka zary Eglizy Olona Velona isika izany hoe ho fahazavana sy fahamarinana eo amin'ny fiainantsika andavanando.

Ry Jesoa Tompo ô ampio izahay ho tsara fo ka hanao ny marina eo anivon'ny fiainanay andavanandro, ampio izahay ho tsara fifandraisana amin'ireo rehetra manodidina anay, ho taranaka mpanorina ka hikatsaka mandrakariva ny fahasoavanao, hikatsaka mandrakariva ny soa iombonana eo amin'ny fanorenana ataonay, hahafoy izahay fa tsy hikatsaka ny harena mitarika amin'ny fahalovana ireny. Miaraka amin'I Masina Maria Reninao sady Reninay izahay amin'izany amin'izao volana Oktobra volan'ny Raozery izao. Amen

Mompera Arseveka Mgr Benjamin Ramaroson